

BERTSO BERRIAK

Aitor Sarriegi Galparsoro

Bertso berriak, uztaileko arratsaldeei jarriak



DANI BLANCO

I

Euskalerriko zaletasuna
ez den arren nobedade,
udan sartuak garenez gero
hona zenbait kontu pare.
Bazkaltzean nahiko jan
ondoren, etzan sofan
eta xuabe-xuabe...
Zer da uztaile siestarik eta
Frantziako Tourrik gabe?

II

Tourraren arau guztietatik
aipamen txiki bat aurki,
idatzi gabe egonagatik
beti betetzen den bati.
Hasieran bai ernai
sprinta noiz heldu zai,
begiak nola ireki...
bukatu eta bost segundora
esnatuko zara beti.

III

Helikoptero irudietan
noiz ez zaizkigu agertu
lasto fardo ta traktoreekin
zenbait irudi okertu?
Bi besoak zabaldu
(eta karrera galdu
pasatuagatik gertu)
frantsesek duten zaletasun hau
ez dut sekula ulertu

IV

Pirinioak iristen dira
etapa lauak utzita,
jan ta edana maite duenak
derrigorrezko bisita
portuaren maldetan,
mugaren bi aldetan
euskal zaletuen zita,
koberturarik ez dute baina
denak laranjaz jantzita.

V

Ziklistetatik zein bai ta zein ez
taldeak ere hautatu,
batzuk barkatu, besteak ahaztu
ta nahi dena inputatu.
Azkenaldian Tourra,
ta ez jarri muturra,
ezin delako ukatu,
bulegoetan hasten da eta
bulegoetan bukatu.

VI

Kilometroetan egin ondoren
hiru bat mila inguru
Champs Elysée-tan azken egunez
elkartzen dira bi mundu;
jende olde itzela
ta bestetik tropela,
azkenak ere lortu du!
Orain zer egin arratsaldetan
pentsatu beharko dugu.

DOINUA: Iparragirre abila dela.



Bidali zure sortak bertsoak@argia.com helbidera. Aukeratuak orri honetan argitaratuko ditugu.